

ՎԱՅՐԷՋՔ

Քառասուն տարի բըռնած ճանապարհ՝
 Շիտակ, անվեհեր
 Գընում եմ ես վեր –
 Դեպ Անհայտը սուրբ, աշխարհքը պայծառ:

5 Քառասուն տարի ճամփովն ահարկու
 Անցել եմ էսպես
 Ու հասել եմ ես,
 Խաղաղությանն եմ հասել ես հոգու:

Թողել եմ ներքե, մեծ լերան տակին,
 10 Ե՛վ փառքը, և՛ գանձ,
 Ե՛վ քեն, և՛ նախանձ –
 Ամենը, ինչ որ ճընշում է հոգին:

Եվ էն ամենը, արդ նայում եմ ես –
 Տեսնում եմ նորից
 15 Իմ լերան ծերից –
 էնպես հասարակ, դատարկ են էնպէս...

Եվ ես իմաստուն ու բեռըս թեթեւ,
 Անհոգ ծիծաղով,
 Երգով ու տաղով
 20 Իջնում եմ զըվարթ իմ լերան ետե: